

Gwo jin 'Ko'd jin 'Kwar ma BUṬERUS mo

Monthe Me'd mo

¹ ASimaan jin ta'da Buṭerus mo, a'di jin ta ciṅkina/ mo dhali a'di jin karu ki she/ mo goma Yesus Kristhos mo.

E uni gwansan kun bu'thki mongam gwo is jin nyakka'd ki ji yinthom bana mo e mo ma kar/e ma Arumgimis bana mo dhali Amanwothh bana jin ta'da Yesus Kristhos mo be.

² Dhalka 'the dhali monku'th is minu mar is mo gom um mo e monyith jin nyithkina uma Arumgimis mo dhali Tapa Yesus bana mo.

Ayuk Bum jin Yuku Um mo dhali Kwany jin Kwanykunu Um mo

³ Mom'bi'th piti jin piyi'd 'peni Arumgimis mo tani a'di ciki'da ris to 'baar mo e ana mo kun minu mii ta mo gom mondiki/e mo dhali mii ma gayiin mo e mo ma nyith piti jin nyithkina ana a'di mo jin yukkina a'di ana mo e monyca jin ta jim pitin gana/ mo dhali e miim 'borgam pitin gana/ mo be.

⁴ E uni mo tani a'di ciki ana gwom piti kun onu is mo kun ta yintho/ ki yintho/ mo dhali kun eka/ ek kagahara mo, dhali ki uni gwansan mo tani ki um mini 'taki ye mo 'peni mo jin pu/uwa pu/ mo, a'di jin di'd e mony'cesh yan mo gom mo jin dhunu e ki 'thir 'thir mo, dhali ki um mini war ki imanpwak buyempa jin piyi'd 'peni Arumgimis mo.

⁵ Haali/ gom 'kup mii yan gana/ mo tani pali aris mii ki 'twan̄kal kuku/ mo mmogalal mon̄gam gwo is bum is mo ki miim 'borga/ mo, dhali miim 'borga/ ki mii jin nyith̄uwa nyith̄ mo,

⁶ dhali mii jin nyith̄uwa nyith̄ mo ki mii ma du jin 'timu mo, dhali ki mii ma du jin 'timu mo ki mii sho'k jin telu mo, dhali mii sho'k jin telu mo ki mii ma gayiin mo,

⁷ dhali mii ma gayiin mo ki momish jin mishu ikam ka rem 'kup mo, dhali mii jin mishu ikam ka rem 'kup mo ki mo/en mo.

⁸ Haali/ wak̄ki/ to gwansan ta kum bum mo dhali ish ka entus mo tani uni mini non um 'peni mii kun ushi me'd mo walla 'peni mo jin molu maman dho'th mo e monyith̄ jin mina umi nyith̄ Tapa Yesus Krist̄hos bana mo be.

⁹ Haali/ a'diyin jin midi har to gwansan mo tani a'di ta'da ja'da/ mo dhali hili'd isi shunse/ mo dhali a'di ṅaki mo mo ki a'di lamkunu mo 'peni miinthusa dhamom piti mo be.

¹⁰ Wakan iwaka, shwayi uma nyor ki thith̄ mo mmote mo ma yuk̄ jin yuku um mo dhala kwany jin kwanykunu um shoka 'cesh mo. Wak̄ki/ um mini mii to yan mo tani um mini 'koki ta'k ki sule/ sule/ mo.

¹¹ Wakan, mo jin tanu pa ki pa mo minu ci um mo, a'di jin ta mo jin ciḅu mo e bampa/ gi Tapam bana mo dhali Amanwoth̄ bana mo jin ta'da Yesus Krist̄hos mo, jin midi di ki sule/ sule/ ya ye 'ba/ mo be.

¹² Wakan aha/ dina gwo ibwa isa yempa/ mo mmoka um gwo e mo gom to gwansan mo, ba um mishki uni mo dhali um telkunu sho'k mo e gwon̄

gana/ mo jin takina um mo be.

¹³ Aha/ ṭoṣha ki a'di 'boro'd mo me'd jin ɕa'bka/ ki ɕa'b buɔgwar is yan mo mmopir um is mo ki bway jin kaka/ um gwo e mo,

¹⁴ me'd jin mishka/ ki mo jin miga/ kar buɔgwar is pem 'pen ka piye/ mo ki 'dishe/ mo me'd gwo jin tora Tapa Yesuṣ Kriṣṭhoṣ bana aha/ mo be.

¹⁵ Dhali aha/ mina hil a'di i e mo, ki 'ko'di yam pem jin miga/ kwa/ is bwa mo tani um mini 'taki mish to gwansan ka e mo, ma ka tee ɕaan mo be.

Uni gun Ta Iman/o Gwo ki E mo gom Monyca ma Kriṣṭhoṣ mo

¹⁶ Haali/ aman 'konaki batha gany gi gwo lolop kun ta ku ma maḱi sho'k mo kun lolopu ki lolop gwocon mo, me'd jin tora aman um eya tente/ mo mom'bi'th mo dhali mompu'd jin mina Tapa Yesuṣ Kriṣṭhoṣ bana pu'du/ mo, hili aman 'kokina mmota iman/o gwo ki e mo gom mo/ek piti mo.

¹⁷ Haali/ ki a'di bu'thki montak mo dhali monyca 'peni Arumgimis jin ta'da Baba mo dhali 'twa/ gwoyi'd gom a'di mo ki Monyca jin Eka/ Ek mo ki: Yansan ta Ya/m pem jin enu mo. Ki a'di mo tani aha/ 'bora bwa mo.

¹⁸ Aman cikkina 'twa/ yansan jin gwoyi'd 'peni momis mo haali/ aman nyakkina 'ko ki a'di mo e wosh jin kogu mo.

¹⁹ Dhali ana takina gi gwo jin onu is mo jin tenu ki nyanye/ mo be. A'di midi 'bor gom um mo wakki/ um mini ɕiya hirdhe/ mo gom a'di yan mo me'da lamba/ mo mmo'twakkina a'di mo mo e bwam mondhurumi'd mo ntaga tee midi 'twak mo

mo dhala cul e gi mon'thamo/ ki cu mo eya dum bum mo.

²⁰ Um mini mii mish to yan 'ban mo ntwa/a/ mo, ki gwoṅ kamu/ jin onu isa kamu/ yisa di'da e bwan Gwo ma Arumgimis jin 'kwarkunu mo jin mina wathin tal 'deṅ kamu/ mish 'pemen piti tor ki is piti a'di 'de/ mo.

²¹ Haali/ gwoṅ kamu/ jin onu isa kamu/ yisa di'da jin pu'dki'd ki bwa gi wathi/ mo, hili 'kwani mmojockina Shi/in Dheleladhelel uni mo tani uni oki gwo 'peni Arumgimis mo be.

2

Imançi Gwo kun Ta Thus ki Thus mo dhali Imanṭor Gwonthus mo

¹ Hili imançi gwonthus si'da/ cuki mis mo e bwan 'kwani mo jasi me'd jin mina imanṭor gwonthus 'ko i bwam um mo, uni gun mini kal gwonthusa tiya kun 'ce'du/ sho'k ka kwal is mo, isi kani mmowat Tapa gwo mo, a'di jin yolki uni mo, mmokal mo jin mina uni tor sho'k ka pupush ki is buni e mony'ce'd sho'k mo.

² Dhali 'kwani ka ris mini bath miim buni kun 'kanuwa kanthi/ isho'k mo, dhali gom miim buni mo tani bway gi gwoṅ gana/ minu sor mo be.

³ Dhali e bwam buni kun purapur mo tani uni mini nyuny um mo mmota nyuncina/ ki gwonthus buni mo. 'Peni kadhamo/ miiwaḳ buni jin toru gwo 'twa/a 'cesh mo tani diki ta nyon'kor mo dhali mony'ce'd sho'k buni si'da/ mo tani diki ish e mo be.

⁴ Haali/ waḳki/ Arumgimis diki 'tash iman'doyu gwo 'twa/ mo me'd jin miina uni miinthus mo

tani, hili a'di ki ta'k uni e mo/o'd mo dhali a'di ki dhu uni e jisa 'kulga/ mo kun ta mondhurumi'd jin 'cethki'da 'tum mo mmodhu uni ntagi gwo jin minu dwall mo be.

⁵ Wakki/ a'di diki 'tash mony'cesha dhamo/ 'twa/ mo tani, hili a'di ki kara Nuuh ki 'dantar mo, a'di jin ta'da amanci gwo mo gom mo ma kar/e mo nyakki 'kwani pesun tiya mo me'd jin kalkina a'di agannu/ yi'de/ apo/ mony'cesh mo jin 'kona iman/ usha ush mo.

⁶ Wakki/ mii jin tugu 'penkuman bampa/ gi Pan Saduum mo dhali Pan Gamuura mo ki burta/ o'd mo tani a'di ki wak uni mo ki mo jin toru gwo 'twa/ a 'cesh ki mony'ce'd sho'k mo dhali dhu uni mo mmota she/mm mo gom uni kun mini ta uni gun ushuna ush mo.

⁷ Dhali wakki/ a'di ye'da Luuth jin ta'da kar/e 'ba/ mo, a'di jin di'd ki dhan mo ma cis ki mii kun 'kanuwa kanthi/ mo gi 'kwanin thus gwansan mo

⁸ (Haali/ a'di jin misha wathin kar/e yan mo dhali cik mo me'd jin ca'ba a'di e bwam uni mo tani a'di tu/ulkunu mo ki isa nyor eya kashiram piti jin ta'da kar/e ka yempa/ mo ka tee kun bathani 'ko'd mo ki miim buni kun ushkina uni gwonkan mii mo).

⁹ Wakan Tapa mishki ye uni 'ba/ mo, uni kun tana gayiin 'peni mompal mo, dhali dhu uni gwansan kun 'koki ta kun kar/ e mo e bwan'kwariny mo jin 'konu ka jisa apo/ mo ntaga tee gi gwon dwall jin minu tor gwo 'twa/a 'cesh mo,

¹⁰ dhali isi ki ji mum mo gom uni gwansan kun ci is buni ki bwa en'dap mo mmoshi/ is buni ki e gun dhuna uni ki 'thir 'thir mo dhali wak mo jin

tanu ki moshirr mo.

Dhali dar gi monyju/ mo dhali ki bwam buni mo tani uni 'koki k̄o/a k̄o/ is mo mmosor uni kun ta gi monyca mo.

¹¹ Bahili iman'doyu gwo mo, ba uni bol tiya e mo ki mo/ek̄ jin caaca kagahara mo dhali mom'bi'th mo tani uni 'koki bah gwo sor jin ta gwon dwall apo/ uni mo mmosul Tapa bway mo.

¹² Hili uni gwansan wana e ki to/e gun 'kon ka miiny mo, kun ta to gun uk̄u mo ki buyem buni mo, uni gun dho'thkunu mo mmobu'th mo dhali mmo'kosh mo tani sorkina sor mo e mii kun 'kokina uni mmota pus mo tani uni minu 'ce'd sho'k mo nyaḱki uni ki mony'ce'd sho'k jin tal 'de/ mo,

¹³ mmo'kosh is ka nyor e miin th̄u'th buni jin th̄u'thkina uni to mii mo. Uni tulki a'di 'kup mo gom 'cem buni kun 'ko ki 'kol uni mo mmomiina uni ki ra'b mo e montee mo. Uni ta monyo/on mo dhali monthalkin mo mmomii ki ra'b mo e miim buni kun 'curkina uni e mo e mii 'baar mo dhali mmoko cuuwa/ ki kawwu mo e mo kun yukuwa yuk̄ ka tul 'kup mo mmonyak̄ki um mo.

¹⁴ Uni takin gi em buni kun 'tu'dkunu ki piny piny ki miinyca mo, a'di jin moli dak̄ mo gom miinthus mo. Uni ellkina ell e mo gom 'kwanin tiya kun 'konuki tela kashiram buni sho'k mo. Uni takin ga dum buni kun yedhu sho'k mo e bwa jin purapur mo. Uni ta uci kun jeekunu mo.

¹⁵ Mmodhalkina uni bwaya kar/e 'pen mo tani uni iiki iim per mo. Uni baḥki bway ma Balaam mo, a'di jin ta ya/ ma Basuur mo, a'di jin enki mo jin gamu nyunycina/ 'peni mii kun th̄udhu mo

¹⁶ hili a'di kucurkunu mo gom gwondhan pitin

gana/ mo. Ntagi thuluny jin mol 'twa/ wal mo, ki wal a'di ki 'twa/ gi wathimpa en'thi/ mo dhali nona manci gwo 'kup 'pena du ma nyonkom piti jin gusa a'di mo be.

¹⁷ Uni gwansan ta jis yi'de/ kun du'dun kun kutha e ki ku'th mo dhali kun tana shile/ kun borkin ma punthar mo. Gom uni mo tani mondhurumi'da 'tum a'di karkunu mo be.

¹⁸ Haali/ 'twam buni kun baha uni mmodhu 'ba/ ki ca mo eya palim buni mo tani uni ellkina ell e ki mii kun 'kanuwa kanthi/ mo ki e kun dhunu ki 'thir 'thir ki bunḡwar is mo, mmo/ell 'kwani e mo, uni gun yekin mo 'peni yokkam gi uni kun 'kon e mii gun thudhu mo be.

¹⁹ Uni oki uni gwo is mo gom mo jin mina uni 'ko ki 'kus mo, hili uni ki is buni mo tani ta ciṅkina/ kun yolu mo e mo jin pu/u mo. Haali/ ma a'diyin jin midi pi wathi/ e mo tani a'di ta ciṅkinam piti mo be.

²⁰ Haali/ wakki/ 'ko'di uni yekin mo 'peni mo jin shi/u bunḡwar is mo 'peni mony'cesh mo ki monyith Tapam bana mo dhali Amanwoth jin ta'da Yesus Kristhos mo tani uni dok/e kothkunu mo e uni mo dhali pinu e mo tani moṅ'kom buni jin ta jin 'ko'd mo tani warki'd ki shi/ kagahara mo gom uni mo mmobol jin twa/a/ e mo be.

²¹ Haali/ a'di midi 'taki 'bor ki isi 'bor gana/ mo gom uni mo ki uni mini 'taki 'koki mish bwaya kar/ e yansan ki sule/ sule/ mo dhali 'ko'di uni mmomishkina uni a'di mo tani uni ki tu'k ka nyan'ko'd 'peni gwoṅkan jin kogu mo jin cikunu uni mo.

²² A'di pu'dki'di uni mo isi ki gwoṅ gana/ mo jin onu 'pena dhamo/ mo ki: A'ka lakki ya/ piti ka

nyañ'ko'd jin ya/kina a'di mo, dhali kuman kuthar upkunu yi'de/ mo jasi mmo'dañkali bwam boro'th jin 'dorotha'doro'th mo be.

3

Gwo jin Onu Is mo gom Pu'djin Mina Tapa Pu'du/ mo

¹ Gwo yansan shwane/ a'di ta gwo jin 'kon ma po/i su/ mo jin 'kwarkika/ um mo, um gun enu mo, dhali e uni su/ kan mo tani aha/ yikinkina uma du is mo e bwam bum kun dar ki washila/ mo e bway yan mo mmoka um gwo e mo,

² ki um mini 'taki ka gwo e mo ki gwo kun onu itwa/a/ mo ki 'twa/ gi imançi gwo ma Arumgimis kadhamo/ mo kun kogu mo dhali ki gwoŋkan gi Tapa mo dhali Amanwoth mo e unim bum kun dhunu ki she/ mo.

³ Ntwa/a/ ka ris to 'baar mo tani um mini mii mish gwo yansan 'ban mo ki uni kun tana mak ka mak mo mini pu'du/ ka tee kuŋ 'ko'd mo ka mak buni mo mmobath en'dap gana/ kun dhuna uni e ki 'thir 'thir mo

⁴ dhali o gwo mo ki: Mane gwom piti jin onu is ki a'di midi pu'du/ mo? Haali/ 'peni me'd jin wukina ibabam bana mo tani aris to 'baar mo 'kon mmoŋikir 'ko mo me'd mii kun 'kokina uni mo 'peni ka muŋ'kup ki mo jin ukunu to mo.

⁵ Uni çi mii 'ko'd mo ki bwam buni mo, ki, ki gwo ma Arumgimis mo tani aris momis 'kokin kadhamo/ innii mo ba/, dhali mony'cesh ukunu 'peni yi'de/ mo dhali ki yi'de/ jin ta yi'de/yi

⁶ dhali ki a'di mo tani mony'cesh jin diki'd mo me'dyin, a'di halaskunu a'di ki yi'de/ mo dhali 'ce'd sho'k mo.

⁷ Hili ki gwon 'de/ mo tani aris momis dhali mony'cesh kun 'kokin mo shwane/ mo tani uni dhunu mo mmo/ish kumma/ mo gom mo/o'd mo, mmo'kokunu mmodhu uni mo ntaga tee jin minu tor gwon dwall 'twa/a 'cesh mo dhali 'ce'd 'kwani sho'k mo uni gun ushuna ush mo be.

⁸ Hili dhalku/ki ci miin 'de/yan 'ko'd mo, um gun enu mo, ki, ki Tapa mo tani ateen 'de/yan wana e ki yil alip mo dhali yil alip mo tani a'di wana e ka teen 'de/ mo be.

⁹ Tapa a'di midi diki miiya diite/ mo gom gwom piti jin ona a'di is mo me'd jin ona kun tiya ki a'di midi taya diite/ mo, hili a'di thonki'da thon me'di 'ko'd mo 'kupki um mo. A'di yisa ona bwa ki tal 'deŋ kamu/ midi 'taki this e mo, hili ka ris 'kwani 'baar mo mini 'taki jidhir mo e mo jin rijuwa du is mo be.

¹⁰ Hila tee gi Tapa mo tani a'di midi pu'du/ mo me'd wathin 'di/ mo dhali yan'ko'd aris momis mini pe mo ki dhan cuuwa/ jin minu rayu/ mo, dhali to kun 'kon e mo ma tor piti mo tani mini wa ki o'd jin ca'b ki wur wur mo, dhali mony'cesh yan mo dhali miim piti mo kun 'kona po/ a'di mo tani minu puri 'baar mo be.

¹¹ Haali/ me'd jin mina ris to gwansani 'baar mo wa mo wakan mo tani um mini ta 'kwani kun mini wakata ka ba/ mo mmomii mii kun kogu mo dhali mii mii ma gayiin mo

¹² mmoçora çor mo dhali gom bwa jin onu ka daran du mo goma tee ma Arumgimis mmopu'du/

mo, haali/ gom a'di mo tani momis minu tushun ki o'd mo dhali minu wa mo dhali to kun 'kon e mo ma tor piti mo tani uni minu to'd ki o'd mo be.

¹³ Hili ki isi gwom piti jin onu is mo tani ana cora momis kun ta kun this mo dhali mony'cesh jin ta jin this mo, a'di jin mina mo ma kar/e nyca'bi cine/ mo be.

¹⁴ Wakan, um gun enu mo, me'd jin corkina um gom to gwansan mo tani shwayi anyor ki thith mo ki um minu gam e a'di mo ki dar gi monyo/o'd mo walla thalkin mo dhali um minu gam mo ki mo ma ku'th is mo.

¹⁵ Dhali kar mo ma thon jin thonkina Tapam bana ana me'di 'ko'd mo gom bway mowoth mo. Wakan si'da/ akam bana jin enu jin ta'da Buulus mo 'kwarki um gwo mo isi ki gwo ki moyuk jin cikunu a'di mo

¹⁶ mmotor a'di yansan mo me'd miim piti jin miikina a'di eya ris gwom piti jin 'kwarkina a'di mo. Dhali gwon tiya kun 'kokin e uni mo tani 'bitha'bi'th mo mmomish 'ban mo, ki uni kun ta pus mo dhali uni kun 'konuki tel sho'k mo tani uni wutulki uni mii mo ntagi mo jin minu 'ce'd sho'k bunin gana/ mo be me'd jin miikina uni gom gwo ma Arumgimisa tiya kun 'kwarkunu mo.

¹⁷ Wakan um gun enu mo mmomisha um a'di ntwa/a/ mo tani jiyi mo ki e mo isi ciki/ mo ki um minu 'koki 'de'k shoki mis mo ki gwo jin thamu mo 'peni 'kwani kun ush gwonkan mii mo dhali this mom bum gana/ jin tela um sho'k e mo.

¹⁸ Hili 'bapi um mo eya 'the mo dhali e monyith Tapam bana mo dhali Amanwoth jin ta'da Yesus Kristhos mo. E a'di mo tani monyca midi di mo

'peni shwane/ mo dhali ntaga tee jin midi di ki
sule/ sule/ ya ye 'ba/ mo. Amen.

Gwo Ma Arumgimis Uduk New Testament and OT Portions

copyright © 2005 SIM International

Language: Uduk

Translation by: SIM International

Uduk New Testament and OT Portions

Published by Bible Alliance Mission, 1983.

. If you are interested in obtaining a printed copy, please contact the SIM at www.sim.org.

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

PDF generated using Haiola and XeLaTeX on 18 Apr 2025 from source files dated 29 Jan 2022

f734434c-b6bd-5d21-abc6-692c3842e034